

## SAN PABLO KARTA NYAFXTE FXI'JNI TIMOTEO JÏI

### *Pablo Timoteo's fxi'jni*

<sup>1</sup> Adxa' Jesukristo jxkaahnisa Pablo yaaseth, txãasa kwe'sxtxi nwe'wesa Dxus vxite' kwe'sxtxi jxpe'jsa Jesukristo txãawe'sx kaahnisath, Jesukristo yuuçxáa nwe'wewa'ja's pta'sxsa. <sup>2</sup> Dxus yakh jxpubamée fxi'zesa isa adx nçxi'k na'wêsa Timoteo's fxi'jaçthu naa karta's. Dxus kwe'sx Tata vxite' kwe'sxtxi jxpe'jsa Kristo Jesus txãawe'sx peeygãhçxa pu'çxte', idxa' ewçxáa wêt fxi'zene'ga.

### *Kaapiya'jni ewmeesa's jxpa'yakxkahn neewe'weni*

<sup>3</sup> Macedonia kiwen u'jweççxa', idxa's Efxeso çxhabtee nvxihtthu Dxus yuwemée txãawe'sx ùus yajkxçxa fxiy kaapiya'jsatx yupkahn. <sup>4</sup> Txã'wême', txãawe'sxa' Dxus librute yu' fxi'jnimeetewa nyafxiitey yaçgawe'sxa' txã'wêtx yūu jīna yajkxçxatx kwentu'ju', aça' txã'wêsatx wêse'khamén idxa' we'wewa'jsag neeyūu. Aça' txã'wêsaçxá's kwentu'jni' Dxus neewe'weçxa nvxihtku txãate yu' le'çxkweçxáa yuhwa selpi'çme'.

<sup>5</sup> Txãa pa'gath na'wê yūuwa'jçxá's jxkaaja: puutx ya'peeygãawa'ja's isa ĩsxiimée ũusuh jxuka yajkxna Dxus yakh yuuçxáa fxi'zewa'ja'sthu neewe'we'. <sup>6</sup> Maai' yu'

txã'wẽ peeygãawa'ju txuteeçxa kwentu selpiwa'jmeesuçxáatx puutx we'wena fxi'ze'.  
 7 Txãawe'sxa' Dxus libru's jiyuwa'ja's kaapiya'jsatx yuu wẽje', nawa txãawe'sxiçxáa yuhwa jiyu'çmeeta' peekx kaapiya'jni's txakwe wala çxhãçxha we'weççxawa.

8 Jiitha'w Dxus jxkaahni leya' ew yuja', ma'wẽ jxkaathe' kxtey yuusáa yakh yu'.  
 9 Ew yũuna fxi'zesatxi' Dxus jxkaahni leya' thegwa'j ji'phme'. Dxus jxkaahni leya' na'wẽsaçxáatx thegwa'j ji'pha': Dxusna açesa, Dxusna nwẽese'jsamée, ewmeesa, pkalsawe'sx, Dxusna ũukhsamée, Dxus yuwe'swa weeçxsa, neywe'sxtxi ikhsa meeçxawa nasa ma'wẽsatxwa ikhsa, 10 ptamumey pkal yũuna fxi'zesa meeçxawa piçthẽ'j pwe'sx txã'wẽ yũusáa, nasatx sũthçxa ikhsa, ĩsxiisa, Dxus uyte isath we'we' jĩna ĩsxiisa. Sa' Dxus yuwemeesuçxáa txã'wẽ puutx we'wena fxi'zeni yu'sa' Dxus leya' yup yuju'k. 11 Aça' adx kaapiya'ja'th txã' ĩsxiinisame', txãasaíi Kristo yuwe ewte nvxiitwa'jsa's Dxusíi adxna neewe'weçxa nvxihtku txãaíiçxá'.

*Dxus peeygãhçxa txakwe ew yũupa'ga weçxani*

12 Kwe'sxtxi jxpe'jsa Jesukristo's weçxa'th, adxa's txhitçxa na'wẽ selpiwa'jsak nvxiht txajx tasxte selpiwa'jsane'tka yu' naa pa'ga. 13 Adxa' nyafxíi yu' ahçeçxa wẽesxuuna pkxuuya' pak-wesaath yu'. Nawa Dxusa' adxa's peeygãhçxa jxpa'gak, jiimeeçxane'tka txã'wẽ yũuna ũsu' naa pa'ga. 14 Txãasa kwe'sxtxi jxpe'jsa pu'çxni' adx

yakha' iiméh walasa yu'k vxite' Kristo Jesus yakh utxaapa'ga txajx peeygãanisawa txã'wěyku walasa yu'.

<sup>15</sup> Kristo Jesus naa kiwete kīj̄k pkalsatx nwe'weya' jīna pta'sxni' īsxiinisame', aça' txã'wě pta'sxni's nasa jxukaysa isa yuhna sūhwa'j ji'phta'. Nawa maatewa jxthaakwe pkalsa' adxthu yu'. <sup>16</sup> Makwe txã'wětewa, Dxusa' adxa's peeygāj̄k, adx txakwe ewmeesatewa Jesukristo' txã'wěsa's khuē'yku wejx peeygāhna jxpa'ga sūjkahnku txã'wě yūu. Aça' maawa adx na'wěy ewmeesa ūsçxawa kwe'sxwa pçumée ītxi fxi'zewa'ja's pejka jxpa'gayuju'nja'w sūjkahnku txã'wě yūu. <sup>17</sup> Txāa pa'ga bagaçxtewa weçxana nes yuuwa'j ji'phta'w jxkaahsa pçuwa'jsame's. Txã' kwe'sx yafxte vxyaasame', nawa bagaçxte yuhwa pçuwa'jsawame'. Dxus txāa yuuçxāa kīhte yuhwa sxiigwa'jsame'.

<sup>18</sup> Adx nçxi'k na'wěsa Timoteo idxa's neewe'weçthu, iidx ūuste ma'wě ew fxi'zewa'ja's ūusuthena txã'sçxāa kxtey yuuna, ew yūuwa'jçxá's pa'pçxuna Dxusa' pu'çxhina sūhna fxi'zekahn. Idx txã'wě ew fxi'zekahnīçxāatx yakthē'jwe'sxwa dxiikhēy pta'sx Dxus yakh jxpubamée selpiwa'jsa' jīna aça' txã'sa' kxtey myuu. <sup>19</sup> Maaíi yu' kīh txã'wě ewsatewa jiiçxa, ki' kīh ewmeesatewa jiiçxawa nwēese'jmeeçxa, Dxus yakh fxi'zenijū jxpubatx. <sup>20</sup> Txã'wě yūusa' Himeneo, Alejandro txāawe'sxta'. Aça' adxa' txāawe'sxtxi' eçxthē'j kusete nvxihtthu, kxah Dxusa's açewe'weya'mée piyaatxna.

## 2

*Dxus yakh ma'wē puutx we'wewa'ja'swa kaapiya'jni*

<sup>1</sup> Nyafxte' Dxus yakh puutx we'wewa'ja's khuē'ythu neewe'we'. I'kwe'sxa' nasa jxukaysa pa'gate Dxusa's weçxana mneewe'wewe txāa yakh puutx we'wena, sa' kīh pējxçxawa pēywa'ja'. <sup>2</sup> Txā'wēy naa kiwete jxkaahna ūssawe'sx jxukaysa pa'gatewa Dxus yakh puutx we'wewa'ja', kxah Dxus pu'çxte' txāawe'sx ew jxkaathe', wēt fxi'zeyā' āja'nja'w kīhwa kuçx yuunimée Dxus yakh yuuçxāa. <sup>3</sup> Kwe'sxtxi nwe'wesa Dxusa' txā'wē yūuni'sku jxthāasu'. <sup>4</sup> Txāa pa'gatey Dxusa' kim yuhtxwa vxitu jxthāasu'çme', jxukaysa ewsa's jiyuçxa ewte neeyūuni'sku jxthāasu'. <sup>5</sup> Txā'wēme', ewte nvxiitwa'jsa' teeçx Dxus yuuçxāa ūsa', aça' txā'wēy Dxus dxi'pte nasaa ju'gu yuuçxa we'we pu'çxsawa teeçx íçxāa ūsa', txā' Jesukristo' kwe'sx kakwe's íçxāa ji'phsa. <sup>6</sup> Txāa Jesukristok jxukaysa ewte neeyūuwa'ja's vxitna pkalsa pa'gate uu txā'wē yūuwa'j en āhte'. <sup>7</sup> Aça' txā'wē yūuni's pta'sxwa'jsa txhitçxa nvxiitnisath, Jesukristo jxkaahnisa. Txāasa adxa' ísxiinimeesa isasa's kaapiya'jwa'jsath, judiu ji'jmée vxite nasawa Dxus yakh jxpubamée fxi'zekahn. Txā'wē kaahnisath jìçxa' ísxiija'çmeeth txā'sa' Kristo' jiia'.

<sup>8</sup> Txāasath neewe'we': Nasa msuuwe'sxwa Dxus yakh puutx we'wewa'j ji'phta' puuina fxi'zemée Dxus yuuçxāana ūusuh jxuka yajkxna. <sup>9</sup> Txā'wēy u'ywe'sxwa ropa iijxūni's

jxpa'yakxwa'ja' nasa we'wekahmen. Sa' dxkhasa's kiduççxa' txakwe wala vxyuu beh ki'pna ew pheu'jmeetewa ewna. <sup>10</sup> Athnisawa jwee pa'gasa iijxūmeeçxawa, Dxus yakh ew fxi'zeniçxáa wejx ewsa', txãa yakhçxáa fxi'zesayã'ja'. <sup>11</sup> U'ywe'sxa' wala jxpa'yakx wëse'jna u'pwa'jsata' kaapiya'jni's. <sup>12</sup> Nasaa ksxavxyste u'y we'wewa'ja's ũsme'nja, sa' piçthê'ja's jxkaahwa'ja'swa ũsme'nja, wejxwa sxuuna'çxáa u'pwa'jsa'. <sup>13</sup> Txã'wë piçthê'ja's jxkaakhameni, Dxusa' Adana's khuẽ'yku pheu'j, e'suk Ewa's pheu'j. <sup>14</sup> Aça' Adan ya'ĩsxiini yuume', u'yku ya'ĩsxii. Txã'wë ya'ĩsxiiçxak pkalte wete. <sup>15</sup> Nawa u'ya' peekx luuçxtxi ew jxpe'jna Dxus yakhwa jxpubamée ew fxi'zeçxa', ewte neeyūuna.

### 3

#### *Ma'wësa anciano yūuwa'ja'swa pta'sxni*

<sup>1</sup> Isath we'we': Maawa dxuus yatte jxkaahwa'ja's jxpa'gasa anciano' mjii ewsa's jxpa'gasa yuuna. <sup>2</sup> Nawa kxtee jxkaahwa'ja's jxpa'gasa' kīhte yuhwa jxpubamée wala ew fxi'zesa yuuwa'ja', āhmée yūute yu'kxpehni fxi'zewa'jsame'. Sa' peekx nyuu yakhçxáa fxi'zesa yuuwa'ja'; kīhtewa jxuka jxpa'yakx fxi'zesa yuuwa'ja', sa' zhiçkwe juuna' yuumée fxi'zesa yuuwa'ja'; paadeesatx yat pki'jna fxi'zesa yuuwa'ja', sa' ewsa's ma'wë kaapiya'jwa'ja'swa jxuka jiisa yuuwa'ja'. <sup>3</sup> Tūuna fxi'zesa yuuwa'jme' puii jxpakwena, vxyu knaywa'jçxá's yajkxna fxi'zesa yuuwa'jme', wejxwa vxyu's

yajkxmée peeygāhna pu'çxna ewçxáa yūuna fxi'zesa yuuwa'ja'. <sup>4</sup> Peekx yattewe'sxtxi ew zhiçxkwe jxpe'jsa yuuwa'ja', sa' peekx luuçxwa nwēese'jna ew fxi'zekahn kaapiya'jsa yuuwa'ja'. <sup>5</sup> Txā'wē peekx yattewe'sx yuhtxwa ew jxpe'jya' ājameeçxa', ¿ma'wē Dxus luuçx yuutxi' jxpe'jya' ājakx? <sup>6</sup> Dxuus yatte jxkaahsa' Kristo's u'se jxpa'gasa yuuwa'jme'. Txā'wēme', wala iiwejçx yajkçxa ewmeete weteena eçxthē'j weteniitey. <sup>7</sup> Nasa Dxusa's jiimeesa ksxavxysuwa wala ew fxi'zesa yuuwa'ja', txā'wē eçxthē'j kusete weteya'mée, nasa ewmée we'wewe'sxte.

*Ma'wēsa diákono yūuwa'ja'swa pta'sxni*

<sup>8</sup> Txā'wēy dxuus yatte pkhaakhesatx theg pu'çxsa diakonowa Dxus dxi'pte wala ew fxi'zesa yuuwa'ja'. Kīh yūuya' puutx we'weçxawa īsxiimée kxtey yuusáa yuuwa'ja'. Tūumée fxi'zesa yuuwa'ja', vxyuu knaywa'jçxá's wejx pa'pçxuna fxi'zesa yuuwa'jme'. <sup>9</sup> Dxus yakh fxi'zewa'ja's ew jiisa yuuna sa' ūustewa jxpubamée ūsthu sūhwa'ja's ji'phusa yuuwa'ja'. <sup>10</sup> Ma'wēsatewa jiyuya' nyafxte maz en nvxihtçxa, kīhtewa ewçxáa fxi'zeni's uyçxa txā'wē dxuus yatte pkhaakhesatx theg pu'çxwa'jsa nvxiitwa'ja'. <sup>11</sup> Txā'wēy u'ywa dxuus yatte selpina fxi'zesa' Dxus dxi'pte wala ew fxi'zesa yuuwa'ja', vxitesatx nuywe'wemée, kīhtewa jxuka jxpa'yakx ewçxáa fxi'zesa yuuwa'ja'. <sup>12</sup> Dxuus yatte pkhaakhesatx theg pu'çxsa diakono' peekx nyuu yakhçxáa fxi'zesa yuuwa'ja', sa' peekx yattewe'sxtxi ew jxpe'jsa yuuwa'ja'. <sup>13</sup> Txā'wē

diakonowe'sxa' txãawe'sx mjĩ's ew mjĩçxa', tuh-thetx fxi'ze', sa' Kristo Jesus yakh fxi'zewaja's thaamemée pta'sxwa'ja's uyu'tx.

*Kwe'sx ewte neeyũuwa'ja's kim yuhnawa kaajiyu'jnimeek ũsu'*

<sup>14</sup> Idx yakh puutx uyya' dud yuwe'nja sũju'th, nawa meeçxa' jxthēeyuuwá'nja sũhçxa naa karta's fxi'jaçthu, <sup>15</sup> kxah Dxus yakh fxi'zesa yakh ew fxi'zeya' ma'wē yũuwa'ja'swa jiyune'ga. Txãawe'sxa' Dxus itxisa luuçxta', txãasatx isa ewsa's nvxihtmée txãate yuuçxáa fxi'ze'.

<sup>16</sup> Kwe'sx ewte neeyũuwa'ja's kim yuhwa jiyunimeek ũsu' txã'sa' Dxusa' kaavxya'ja'kh txã' na'wē seena' walasa':

Dxusa' nasaa kakwe yakhku vxyaa,

Sa' Dxus Espiritu we'weçxa': Txã' kĩh pkal yuhwa ji'phmeesa' jĩnik yuu.

Aça' Dxus angeleswe'sxwa uyniisak yuu.

Sa' mtee mteewa jxuka pta'sxni yuute',

Naa kiwete msuuwe'sxwa maaĩ yu' txãawe'sx ũuste jxpa'gatx.

Txajũ' cielute ki' jxpa'ganik yuu.

## 4

*Dxus tasxuh txuteeçxa ewmeesaçxá's kaapiya'jsa*

<sup>1</sup> Txã'wē ew ãate kaavxya'ja'jni yuutewa, maaĩ yu' nmeh en yuuçte' Dxus tasxu txuteetxna eçxthē'j ĩsxiina kaapiya'jnite fxi'zeya'. Txã'jĩnak Dxus Espiritu' ãate pta'sxi'.

<sup>2</sup> Txãa nasa ĩsxiina kaapiya'jsa' yuwejuçxáa ew we'weçxa', ũuste yu' eçx jxkaahniçxá's

nwēese'jna ewsa yu's nwēese'jsame' <sup>3</sup> na'wē jxkaajatxna: Kabawa'jme' sa' ũ'tasxa's Dxus nvxihtku Dxus nwe'wenisa ewsaçxá's nwēese'jsawe'sx Dxusa's weçxana ũ'kahn txāa ũ'a's txhitçxaçxáa ũ'wa'ja' jĩtxna. <sup>4</sup> Txā'wē yuukahmenĩ Dxus nvxiitnisa yu' kĩh ũ'wa jxuka ewsa', aça' ewmeesa' jĩmēe ũ'wa'ja', <sup>5</sup> txāa pa'gatey Dxus yuwete we'weçxa': Ũ'a' jxuka ewsa' jĩ'k aça' ũ'a's jxpa'gaçxa' Dxusa's weçxaçxa ũ'te', ewmeesa yu'çme'.

*Jesukristo's wala ew selpisáa*

<sup>6</sup> Txā'wē Dxus yakh fxi'zewa'ja's ũuste yu'akhçxa isasaçxá's kaapiya'jni's ew piyaçxa yakthē'jwe'sxtxi kaypuba'jmēe jxpe'jçxa', Jesukristo's wala ew selpisaaçxa txā'wē yuune'ga. <sup>7</sup> Dxus yakh fxi'zewa'jmeeçxá's we'weni seelpimeesatxi' nwēese'jmēe, Dxus yakh fxi'zewa'jçxá's çxhãçxha mpa'pçxu. <sup>8</sup> Txā'wēme' kakwe çxhãçxhawa'jçxá's pa'pçxute', jwee yu' selpi'çme'. Nawa Dxus yakh fxi'zewa'ja's çxhãçxha pa'pçxunisak wejx jxthaakwe selpi'. Txā'wēsa' naa kiwete ew fxi'zewa'thek selpi', sa' cielutewa selpiwa'jsaiiçxá'. <sup>9</sup> Na'wē pta'sxni' ĩsxiinisame', aça' jxukaysa nwēese'jwa'j ji'phta'. <sup>10</sup> Txāa pa'gaiiçxáatha'w pxthaa ya'iiwēesxuunawa çxhãçxha mjĩ', txāa pa'gatey Dxus ĩtxisa ũsa' txā' pu'çx yujuna sũju'tha'w, txā' naa kiwete nasa jxukaysatx nwe'wesa' txā'sna ũuste jxpa'gasa yuutxi' jxuka.

<sup>11</sup> Txā'wē yũuwa'ja's ew kaapiya'jwa'j ji'phgu.

<sup>12</sup> Sa' piçtakxa' jĩna weeçxwe'sxte wala ew



mfxi'ze, kxah Dxusa's jüisawe'sx iidx fxi'zeni's uyçxa', txã'wëy ew fxi'zekahn kîhtewa üus yajkçxa mwe'we. Sa' txãawe'sxtxi peeygãhna mfxi'ze, Dxus yakh jxpubamée, kîhte yuhwa pkalte wetemée. <sup>13</sup> Adx pa'phkaçx idxa' Dxus yuwe's nasaa ksxavxyte lëeyna, yu'kxpehna kaapiya'jna yuuwa'jçxá's pa'pçxuna mes. <sup>14</sup> Idx kîhtewa sxiigmée ajawa'ja's Dxusa' üsku ancianowe'sx idxa's peekizeçxa Dxus yakh puutx we'wete txãatxi' ivxiituya'mée wala mpa'yajkx. <sup>15</sup> Txã'wë ew fxi'zewa'ja's yuuçxáa peçxkanamée mfxi'ze, kxah idxa' Dxus yakh jweeíçxáa çxhãçxhana u'jni's jxukaysa uyuutxna. <sup>16</sup> Peekíi wala mpa'yajkx sa' kaapiya'jni'swa txã'wëy mpa'yajkx kîhte yuhwa sxiigmée. Txã'wë yüuçxa', idxíwa ewte neeyüune'ga, sa' iidx pta'sxni's wëse'jsatxwa ewte nvxiitune'ga.

## 5

### *Dxus yakh fxi'zesatx na'wë yüuna fxi'zewa'ja'*

<sup>1</sup> Idxa' thë'jsatxi's juuna' we'wena yu'kxpehmée, wejxwa peeygãhna ewçxáa myu'kxpeh, iidx tata na'wë yajkxna. Sa' piçtakxtxiwa iidx nyakhwe'sx na'wë yajkxna myu'kxpeh. <sup>2</sup> U'y thë'jsatxwa iidx mama na'wë yajkxna ewkuëçxáa myu'kxpeh. Sa' kna'sawe'sxtxiwa iidx npe'sx na'wë yajkxna myu'kxpeh wala jxpa'yakx fxi'zena.

<sup>3</sup> Nmi' uute u'yçxáa neeyüusaawe'sx kîhwa ji'phmée pejiina üssatxi' mpu'çx. <sup>4</sup> Nawa txãawe'sxa' nçxi'k meeçxa' nçun ji'phuwáatxna açá' txãa nçun meeçxawa nçxi'k txã'wë

njǐ'ja's jxpe'jwa'j ji'phta', neywe'sx ma'wēne'ta peeygāhna jxpe'j txā'wēy yūuwa'j ji'phta'. Txā'wēk Dxusa' jxthāasu'. <sup>5</sup> Nawa nmi' uute' luuçx ji'phméé txāaçxáa neeyūusa', Dxus yuuçxáanatx een isa neewe'wena fxi'ze', Dxusa' pu'çxhina sūhna. <sup>6</sup> Nawa vxite' txā'wē yūumée nmi' uuyā'the' naa kiwetewe'sxçxá's yajkxna fxi'zesa' uuní na'wēsaya'tha'. <sup>7</sup> Åçha' nasa ekajuwe'sx ewméé nuywe'wekahmén, na'wē yūuwa'ja'swa mkaapiya'j u'yçxáa neeyūsáa ji'jtx: <sup>8</sup> Txā'wē peekx nwe'sxtxi jxpe'jwa'j ji'pha', sa' peekx yattewe'sx yuutxi' wejx thaakwe thegwa'j ji'pha', naa kxah kxtey yuumeeçxa' Dxus luuçxthu sūhwa'j ji'phme' sa' Dxusa's jiimeesate jxthaakwek yuuwesa yuuna.

<sup>9</sup> Nmi' uute' u'yçxáa neeyūsaaatxi' pu'çxwa'ja', nawa sesenta anxu ji'phsa teeçx nmi' yakhçxáa fxi'zesatx txā'wē pu'çxwa'ja'. <sup>10</sup> Txāawe'sxa' bagaçxtewa ew fxi'zesa yuutxna na'wē yūuna: luuçx ji'phsaçxa' txāatx ew jxpe'jsa yuutxna, yatte pa'jsatx jxpa'gasa yuutxna, yakhtē'jwe'sxtxi peeygāhna pu'çxsa yuutxna, nxuste pxthaa yuusatx pu'çxsa yuutxna, kihtewa jxuka ewçxáa yūuna fxi'zesaçxáatx pu'çxwa'ja'.

<sup>11</sup> Nawa sesenta anxu āhmée ji'phsatxi' jxpa'gawa'jme'. Txā'wēme', ki' imi'wa'jçxá's yaakxnite Kristo tasxu txuteetxna, <sup>12</sup> açá' txā'wē yūuçxa' yuuwesa yuutxna, txā'wē Kristo yakh fxi'zeya' puutx we'weni's e'skhē nvxiitpa'ga. <sup>13</sup> Sa' txā'wēsa' yat iisa pa'jna u'jya' piyaatxna, mjīwa'j yu'sa' yaakxsamée

yuuna. Sa' txã'wẽçxáamée, txã'wẽ txãawe'sx we'wewa'jmeesu jxuka we'we pu'çxya' piyaçxa', yuwee ksuusu'jsa yuutxna. <sup>14</sup> Txãa pa'ga nee kna'satey txãawe'sx nmi' uute', txãawe'sxa' ki' iimi'çxa luuçx uyçxa yatte fxi'zetxna, txã'wẽ Dxus yakh fxi'zesatx açesa nuywe'wekahméntu txã'wẽ jxkaaja'. <sup>15</sup> Txã'wẽ yũumeeçxa maaíi yu' Dxusa's peçxkanaçxa eçxthē'j yakh fxi'zena ũsta'.

<sup>16</sup> Dxusna jiisa' nçxi'k ma'k yuu meeçxa' niisa ma'k yuu nawa maawa i'kwe'sx nwe'sx txã'wẽ u'yçxáa neeyũusa's sã'jĩna jxpe'jwa'j ji'phi'kwe, kxah dxuus yatte pkhaakhesawe'sxa' txakwe thēysa's uymeetxna txãa u'ytxi pu'çxna, naasáa kĩh nwe'sx yuhwa ji'phmeesaçxá's pu'çxwa'jsata'.

<sup>17</sup> Dxus yuwe's pta'sxna kaapiya'jna nasatx ew jxpe'jsa' wala ew pu'çxni fxi'zewa'j ji'phta'. <sup>18</sup> Txãa pa'gatey Dxus libru' na'wẽk pta'sxi': Mjĩisa bwey yuwe's tudnu iiũ' mjĩikahn jĩ'k, sa' vxite ajkhēwa we'weçxa': Mjĩisa' jxpa'gawa'j ji'pha' jĩ'k.

<sup>19</sup> Dxus yuwe's pta'sxsatx yuuwesa' jĩna nuywe'weni's e'z meeçxawa tekx ew jiisa kasehmey yu' nwēese'jnu. <sup>20</sup> Nawa isa pkalte dxih fxi'zena ũste jiyuçxa', juuna' mwe'we jxukaysa ksxavxyte, kxah vxite wēse'jna ũssa' ũukhçxa pkalte fxi'zemeetxna. <sup>21</sup> Dxus vxite' kwe'sxtxi jxpe'jsa Jesukristo vxite' Dxus angel txhitxnisá txãawe'sx dxi'pte txã'wẽ yũuwa'ja's kajaçthu, āhmée yũusatxi' jxukaytxi txãa na'wẽçxaçxáa we'wena

yu'kxpejkahn. <sup>22</sup> Jiyumey yu' kim yuhnawa dxuus yatte jxkaahwa'jsa ki'pnu. Txã'wě jiyumey jxkaahwa'jsa ki'pçxa', txajx pkala's sũth pu'çxsa yuune'ga. Kĩhwa ewmeesa yu's jxuka mpa'yajkx.

<sup>23</sup> Nawa tutxh wala ãça'g txãa pa'ga yuuçxáa yu'çxá's yu' tudxmée, uwa yu' pusmeesa yu's le'çxkwe mtudx.

<sup>24</sup> Maaíi yu' txãawe'sx pkala' wala ãate ya'jiyu'tx paapējxmeetewa. Nawa vxite' ya'jiyu'çmeeta', txã'wěsa' nmeh ente yã'jçxáa ya'jiyuna. <sup>25</sup> Txã'wěytxi ew yũuna fxi'zenisawa ãate ya'jiyu', sa' ew yũuna fxi'zenisa dud yu' ãate ya'jiyumeeçxawa, bagaçxtewa vxyaamée yu' neeyũumeetxna.

## 6

*Dxus yakh fxi'zenisa' naa kiwete ji'phunite thaakwe walasa'*

<sup>1</sup> Selpiisá' i'kwe'sx patron yakh wala jxpa'yakx nwěese'jna mfxi'zewe, Dxusa's açewe'weni yuukahmén vxite' kwe'sx kaapiya'jni'swa txã'wěy ewmée we'wekahmén. <sup>2</sup> Sa' selpisaawe'sx i'kwe'sx patron maaiia' Dxusa's jiisa wáa yuuna açá' txã'wě kwe'sx yakthē'j i'çxá' sũhçxaçxáa le'çxkwe nwěese'jmée fxi'zewa'j ji'phmeeta', wejxwa jweeíçxáa ew selpiwa'j ji'phta', txãa pa'gatey Dxusna jiisatxi'çxáa wejx ew pu'çxna selpiwa'ja' peeygãhna. Txã'wě yũuwa'ja's pta'sxna mkaapiya'j.

<sup>3</sup> Maaíi yu' kwe'sxtxi jxpe'jsa Jesukristo kaapiya'jni'smée, fxiy wáa pta'sxina kwe'sx kaapiya'jni'swamée, <sup>4</sup> sa' txã' ũuste iiwejçx yaakxsa kîhwa jiimeesaçxa txã'wě yuuna. Naasáa txã' luuku na'wě kîhwa seelpimeesuçxáa we'wena fxi'zesa yuuna aç'a' txã'wě yũupa'gak vxitetx ewmée yũuwa'j kaseje': açeyaakxni, puini, wěesxuni, nasa ewsatx ewmeesata' sũhna fxi'zeni, <sup>5</sup> puiiwa'j pçuwa'jmeeek kaseje', txã'wě nasa Dxusa's jiimeesawe'sx yakh. Sa' ewmée kaapiya'jsawe'sxa' Dxus yakh fxi'zeni jînisa' vxyuu knaynisana sũju'tx. Txã'wěsa yakha' pkhaakhenu. <sup>6</sup> Txã'wě Dxus yakh fxi'zenisa' naa kiwete iiméh wala ji'phunisate jxthaakwe walasa' kîhwa ji'phmeeçxawa wět fxi'zesa yakh yu'. <sup>7</sup> Txãa pa'gatey kwe'sxa' naa kiwete kîhwa ji'phmeetha'w pa'j na' kîhwa ji'phmée kaseje'nja'w. <sup>8</sup> Txã'wě kîhwa ji'phmeeçxawa ũ'wa'j vxite' athwa'j ropa txã'wěsatx ji'phçxaçxáa weçxana fxi'zewa'j ji'ptha'w. <sup>9</sup> Nawa txã'wě yaakxsame' maaíi yu' wala ji'phu wěeniçxá's yaakxsa' ewmeetetx wete', ewmée yũuwa'jçxá's yaakxpa'ga. Sa' txã'wě yaakxnisa' nasatx ewmeete kaaivxitu'jsaçxá'. <sup>10</sup> Txã'wě vxyuçxá's wejx thaakwe yaakxpa'gáiçxáak kîhtewa jxuka ewmée yũuwa'jçxaçxáa kaseje'. Txãa pa'ga maaíi yu' vxyuu ji'phu wěeniçxá's yaakxsa' Dxus yakh fxi'zenijũ txuteeçxa wala nxusteçxáa fxi'zena ũsta' peekíi.

*Dxus yuuçxá's ũuste peçxkanamée  
yaakxwa'ja's mji'phu*

11 Nawa idxa' Dxusna nwēese'jsag naa pa'ga txāa ewmeejũ jxuka txuteeçxa kĩhte yuhwa jxpubamée Dxusçxáana yajkxna vxitetx peeygāhna thēysa pa'thewa txāatxi' yajkxmée ũusuh jxuka manvxiht ewmeesa's. 12 Dxus yakh txutemée fxi'zewa'ja'sçxáa çxhãçxha mpa'pçxu, bagaçxte yuhwa pçumée ĩtxi fxi'zewa'ja'sçxáa yajkxna. Txã'wē yuukahníçxáak Dxusa' pa'ya, aça' idxa' jxukaysa dxi'pte Dxus yakhçxáa fxi'ze'nja jĩnag we'we. 13 Dxusa' na'wē ĩtxi fxi'zewa'ja's peesu'k kījĩhçxah ũsna txāatx jxuka vxite' Jesukristowa Dxus Nçxi'kthu jĩna āate pta'sxku Poncio Pilato tasxte txã'wē yuusaawe'sx dxi'pte āçxha' idxa's jxkaajaçthu: 14 Adx ma'wē jxkaahni's kxtey nwēese'jene'ga kĩhte yuhwa jxpubana yu'pthehmée kwe'sxtxi jxpe'jsa Jesukristo kĩhpkaçx. 15 Jesukristo kīiwa'j en āhte', Dxusa' Jesukristo's kaavxya'ja'jana, txāa pa'gatey Dxus yuuçxáa kĩhtewa jxuka ājawa'jsa txāa yuuçxá', sa' Maa jxkaahsatewa jxthaakwe jxtuhthesa', Maatewa jxthaakwe çxhãçxhasa. 16 Txāa yuuçxáa uuwa'jsame', eena' kweethnite kim yuhwa utxaaya' ājanimeete ũssa. Txã'sa' maa piçthē'j yuhwa iuymeetxna sa' āçxpkaçx iuymeeta'. Txakwe seena' walasa txāa yuuçxá's tuuthe'jni yuuwa'ja', bagaçxte yuhwa pçuwa'jmeesa's.

17 Naa kiwete ji'phsatxi' mwe'we, ji'phuwa'jçxá's pa'pçxuna iiwejçx yajkxna fxi'zekahmén. Txã'wēme' ji'phuniçxá's yaakxni' wala kxulsata', wejxwa Dxusa'sçxáa yaakitxna, txāa pa'gatey txã' ĩtxisa', kwe'sx kĩhçxah

peejini'swa peejxmée jxuka ũssa. <sup>18</sup> Ew yũuwa'jçxá's mkaah, kxah txãawe'sx ew yũuniçxá's ji'phsa yuutxna, sa' txãawe'sx ji'phuni's vxitetx jtxuhdeya'wa piyaatxna. <sup>19</sup> Txã'wě yũuçxa' cielute jxpa'gawa'ja's jxaawsa yuuçxa, bagaçxte yuhwa pçumée îtxi fxi'zewa'ja's jxpa'gasa yuutxna.

*Timoteo jxpa'yajkx fxi'zewa'ja's neewe'weni*

<sup>20</sup> Timoteo, idxna neewe'weni's mpa'yajkx. We'weni kîhwa seelpimeesatxi' wěse'jnu, sa' Dxus yuwete jxthaakwe jiisatha'w jîna weeçxsatxwa nwěese'jnu. <sup>21</sup> Txã'wě yũumeeçxaíí maaií yu' txã'jîna we'wesa yakh u'jsa' jxpubana ũsta' Dxus yakh fxi'zenijũ. Txã'wě yũukahmén, Dxusa' idxa's pu'çxhina.

**Dyus Yuwe U'sesa**  
**Páez: Dyus Yuwe U'sesa New Testament**

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

06da09f4-8d0f-5001-ae8c-0e6aa0131ffd